



Broj: 01-50-1-15-8/07
Sarajevo, 26. aprila 2007.

ZAPISNIK

8. sjednice Predstavničkog doma
Parlamentarne skupštine Bosne i Hercegovine,
održane 26. aprila 2007. godine

Sjednica je počela u 10,05 sati. Prisustvovalo je 37 poslanika. Odsustvo su, zbog službenog puta, opravdali poslanici: Halid Genjac, Zlatko Lagumdžija, Slavko Matić, Remzija Kadrić i Sadik Ahmetović.

Iz Vijeća ministara BiH sjednici su prisustvovali zamjenici ministara Srđan Arnaut i Senad Šepić.

Zbog razmatranja izvještaja sjednici su prisustvovali guverner Centralne banke Kemal Kozarić, predsjednik Centralne izborne komisije BiH Stjepan Mikić i članovi Tihomir Vujičić i Vehid Šehić, te pravobranilac BiH Dragica Miletić.

Na početku sjednice, u okviru prethodnog pitanja, pred Domom su svečane izjave dali novi poslanici Salko Sokolović i Adem Huskić, kojima je Centralna izborna komisija BiH dodijelila mandat poslanika kao sljedećim kvalificiranim poslanicima s liste Stranke demokratske akcije i Stranke za Bosnu i Hercegovinu umjesto Edina Mušića i Vahida Heće – koji su podnijeli ostavku na dužnost poslanika zbog odlaska na druge dužnosti.

Nakon davanja svečane izjave, predsjedavajući Belkić je u uvodnim napomenama podsjetio na izmjene i dopune dnevnog reda, tako da je:

- skinuta 5. tačka – Prijedlog zakona o izmjenama i dopunama Zakona o industrijskom vlasništvu – jer nije završena procedura u nadležnoj komisiji;

- uvrštene su dvije tačke:

- a) imenovanje tri člana u Komisiju za izradu teksta himne Bosne i Hercegovine i
- b) imenovanje članova u komisije i delegacije Parlamentarne skupštine BiH.

O prijedlogu dnevnog reda nije bilo rasprave, pa je predsjedavajući konstatirao da 8. sjednica Predstavničkog doma ima sljedeći

DNEVNI RED

1. Usvajanje Zapisnika 7. sjednice Predstavničkog doma;
2. Poslanička pitanja i odgovori;
3. Zahtjev poslanika Jerka Ivankovića Lijanovića za razmatranje Prijedloga zakona o izmjeni Zakona o porezu na dodatu vrijednost po hitnom postupku, u skladu s članom 127. Poslovnika Doma;
4. Prijedlog zakona o dopunama Izbornog zakona BiH (drugo čitanje);
5. Prijedlog zakona o izmjeni Zakona o konkurenciji BiH - predlagач: poslanik Milorad Živković (drugo čitanje);
6. Prijedlog okvirnog zakona o predškolskom odgoju i obrazovanju u Bosni i Hercegovini (prvo čitanje);
7. Godišnji izvještaj Centralne banke BiH za 2006. godinu;
8. Finansijski izvještaj Centralne banke BiH za 2006. godinu;

9. Izvještaj o radu Centralne izborne komisije BiH za 2006. godinu;
10. Izvještaj o radu Pravobranilaštva BiH za 2006. godinu;
11. Izvještaj komisije Kolegija o nastojanju za postizanje sporazuma o prijedlogu zaključka poslanika Sadika Ahmetovića, predloženog na 7. sjednici Doma;
12. Razmatranje inicijative za pokretanje javne kampanje protiv iskorištavanja radnika na crno i utvrđivanje liste poslodavaca koji zapošljavaju radnike na crno (predlagač: poslanik Denis Bećirović);
13. Imenovanje tri člana iz Predstavničkog doma u Komisiju za izbor teksta himne Bosne i Hercegovine,
14. Imenovanje članova u komisije i delegacije Parlamentarne skupštine BiH;
15. Davanje saglasnosti za ratifikaciju:
 - a) Sporazuma između Vijeća ministara BiH i Vlade Kraljevine Danske o prihvatu lica čiji je boravak protuzakonit,
 - b) Sporazuma između Bosne i Hercegovine i Republike Hrvatske o izmjeni Sporazuma između Vlade Bosne i Hercegovine, Vlade Federacije BiH i Vlade Republike Hrvatske o međusobnom izvršavanju sudskih odluka i krivičnim stvarima,
 - c) Sporazuma između Vijeća ministara BiH i Vlade Republike Mađarske o saradnji u oblasti obrazovanja, nauke i kulture,
 - d) Sporazuma o privrednoj saradnji između Vijeća ministara BiH i Vlade Republike Mađarske,
 - e) Strateškog sporazuma o saradnji između Vijeća ministara BiH i Ureda Evropske policije (EUROPOL),
 - f) Ugovora o finansiranju između Bosne i Hercegovine i Evropske investicione banke – Projekat obnove električne energije II ,
 - g) Privremenog ugovora o slobodnoj trgovini između Vijeća ministara BiH i Misije privremene uprave Ujedinjenih naroda na Kosovu,
 - h) Sporazuma između Vijeća ministara BiH i Vlade Republike Francuske o readmisiji lica s nezakonitim statusom i Protokola o primjeni Sporazuma,
 - i) Sporazuma između Vijeća ministara BiH i Vlade Arapske Republike Egipat o saradnji u oblasti suzbijanja kriminala.

Ad – 1. Zapisnik 7. sjednice Predstavničkog doma

Denis Bećirović prigovorio je što u Zapisniku nije navedeno da je on, u okviru 2. tačke – Poslanička pitanja i odgovori, predložio da Dom usvoji zaključak – da se do ove sjednice poslanicima dostavi lista s poslaničkim pitanjima - sadržaj pitanja, kome i kada su postavljena – i da je taj zaključak prihvaćen.

Bećirović je još zatražio da se na 7. strani Zapisnika (9. tačka) – prije rečenice “Nije bilo rasprave pa je odmah provedeno glasanje”, upiše rečenica: “Za raspravu se javio predlagač tačke dnevnog reda, poslanik Denis Bećirović, ali predsjedavajući nije dozvolio da se rasprava otvori, suprotno praksi koju je primijenio u 8. tački dnevnog reda.”

Poslije kraće rasprave između predsjedavajućeg Belkića i Bećirovića, predsjedavajući je konstatirao da se obavezuje Služba da izvrši uvid u transkript i provjeri opravdanost primjedbi poslanika Bećirovića i da o tome obavijesti Dom na narednoj sjednici, prilikom usvajanja Zapisnika 8. sjednice.¹ Zatim je Zapisnik dao na glasanje.

Sa 33 glasa “za” i dva “suzdržana”, usvojen je Zapisnik 7. sjednice, s navedenom konstatacijom predsjedavajućeg Doma.

¹ Uvidom u transkript 7. sjednice ustanovljeno je da poslanik Bećirović jeste predložio spomenuti zaključak, ali da o njemu nije izvršeno glasanje, pa zato nije ni naveden u Zapisniku. Zapisnik 7. sjednice dopunjen je u smislu da je zaključak predložen i da je predsjedavajući konstatirao da ne treba usvajati zaključak, a da će se organizirati dostavljanje poslaničkih pitanja kako je poslanik Bećirović tražio.

Što se tiče druge primjedbe poslanika Bećirovića vezano za 9. tačku, utvrđeno je da u transkriptu nema ni jedne diskusije u okviru ove tačke.

Ad – 2. Poslanička pitanja i odgovori

Predsjedavajući Belkić konstatirao je da su za ovu sjednicu odgovore na pitanja dobili poslanici:

- Snježana Rajilić, od Uprave za indirektno oporezivanje BiH - na pitanje postavljeno na 5. sjednici,
- Azra Alajbegović, od Instituta za akreditiranje – na pitanje postavljeno na 6. sjednici,
- Husein Nanić, od Službe za zajedničke poslove institucija BiH – na pitanje postavljeno na 7. sjednici,
- Milorad Živković, od ministra vanjskih poslova – na pitanje postavljeno na 7. sjednici i
- Slavko Jovičić, od ministra vanjskih poslova – na pitanje postavljeno na 7. sjednici.

Zatim je predsjedavajući naveo i imena poslanika na čija pitanja nije odgovoreno.

Drago Kalabić rekao je da je on dobio odgovor na pitanje, ali da je odgovor strogo povjerljive prirode, da ga je on dobio od ministra Sadovića te da ne može prihvatiti takav način komunikacije. Poslaničko pitanje javno je postavljeno te on moli ministra Sadovića da nađe načina, poštujući propisanu proceduru, da odgovor na pitanje ne dobije on sam, jer se poslanička pitanja postavljaju u ime javnosti i u ime različitih interesa, rekao je, uz ostalo, Drago Kalabić.

U vezi s odgovorima na pitanja, govorili su Slavko Jovičić i Milorad Živković.

Postavljena su nova pitanja kako slijedi:

Milorad Živković:

Iznoseći nezadovoljstvo odgovorom ministra vanjskih poslova na pitanje sa 7. sjednice u vezi s razgovorom s ambasadorom Irana, postavio potpitanje:

«Koji je zvaničan stav BiH u vezi s razvijanjem nuklearne tehnologije od strane Irana?»

Postavio je sljedeća nova pitanja:

«S obzirom na oprečne tvrdnje u vezi s razgovorom s predsjednikom Srbije Tadićem o odluci dijela Predsjedništva BiH da se pozove Srbija da bez odgađanja uhapsi i isporuči optužene za ratne zločine, moje pitanje glasi:

1. Da li je odluka bila predmet razgovora ministra Alkalaja s predsjednikom Srbije Tadićem?
2. Ako jeste, kakav je zvaničan stav BiH zastupan u tim razgovorima?

Šefik Džaferović:

«Pitanje predsjedavajućem Vijeća ministara BiH: Zbog čega Vijeće ministara BiH u ovom sastavu nije za 105 dana od konstituiranja utvrdilo prijedlog nijednog zakona i dostavilo ga u parlamentarnu proceduru? Ovo posebno kada se imaju u vidu obaveze koje BiH ima na svom evropskom putu. Šta se dešava kada su u pitanju zakonske inicijative? Zašto ih nema? Zašto nema prijedloga zakona u Parlamentu BiH i kada će to početi raditi?»

Azra Hadžiahmetović:

«Moje pitanje odnosi se na sljedeće: Koliko ima imenovanih sudija s mandatom koji su navršili starosnu dob propisanu za obavezan odlazak u penziju? Koji su razlozi rukovodili Visoko sudsko i tužilačko vijeće BiH da se opredijeli za imenovanje, odnosno mandat sudija i zašto se ne primjenjuje pravilo o starosnoj dobi za prestanak mandata? Na osnovu čijeg i kakvog dokumenta je Visoko sudsko i tužilačko vijeće BiH cijenilo ispunjavanje prvog uslova za imenovanje sudija – "da ima psihofizičke sposobnosti?"

Milica Marković:

«Od kojeg perioda i na osnovu koje odluke je Minisarstvo civilnih poslova BiH počelo planirati i realizirati sredstva za finansiranje institucija kulture u BiH, s detaljnim sljedećim podacima:

1. Koje institucije se sada (2007.) finansiraju od sredstava za kulturu u okviru Ministarstva civilnih poslova BiH?
2. Koliko je ukupno utrošeno sredstava za ovu oblast u 2006. godini (rad pojedinih institucija, programi kulturnih aktivnosti kao i namjenska sredstva po zahtjevu fizičkih ili pravnih lica za pojedine projekte)?
2. Koliko je svaka institucija kulture u BiH pojedinačno dobila za rad i aktivnosti u 2006. godini?»

Mehmed Suljkanović:

«Moje pitanje upućeno je Ministarstvu vanjskih poslova BiH, a vezano je za predstavništva i biroa i slične ili slične institucije uspostavljene, angažirane ili finansirane od entiteta Republika Srpska, te lobističke aktivnosti RS-a u inozemstvu. Pitanje je razrađeno po segmentima koji glase:

- u kojim zemljama postoji predstavništvo, biro ili slična institucija uspostavljena, angažirana ili finansirana od entiteta RS?
- iz kojih sredstava se predmetne institucije finansiraju?
- koji je godišnji budžet pomenutih institucija, uključujući specifične stavke za svaku pojedinačnu instituciju?
- kojim aktivnostima se bave navedene institucije, uključujući specifične stavke za svaku instituciju pojedinačno?
- prema kojim institucijama ili zvaničnicima zemlje domaćina djeluju predmetne institucije, te u vezi s kojim specifičnim pitanjima?
- u kojim zemljama je entitet Republika Srpska angažirala ili trenutno ostvaruje lobističke ili slične predstavničke usluge?
- iz kojih sredstava se finansiraju predmetne usluge?
- koji je godišnji budžet svih predmetnih usluga uključujući specifične stavke za sve pojedinačne usluge?
- kojim aktivnostima se bave firme ili kuće koje pružaju predmetne usluge uključujući što detaljnije specifične aktivnosti svih pojedinačnih firmi ili kuća?
- prema kojim institucijama ili zvaničnicima zemlje domaćina djeluju predmetne firme ili kuće, te u vezi s kojim specifičnim pitanjima?»

Rifat Dolić:

1. Pitanje direktoru SIPA-e: «Kakvi su rezultati i sudbina istrage koja je svojevremeno vođena protiv grupe lica i firme „Galaksija“ iz Bihaća, vlasništvo Emina Pivića, na osnovu sumnje da su u periodu od 1996. do 2000. godine preko graničnog prijelaza Izačić kod Bihaća bez plaćanja carine i uvoznih dažbina uvezli preko 100 šlepera visokotarifne robe i tako oštetili Budžet Federacije BiH za više miliona KM?»

2. Pitanje ministru vanjskih poslova i Vijeću ministara BiH: «Šta možete preduzeti na profesionalnijem reguliranju prelaska granice na graničnom prijelazu Maljevac kod Velike Kladuše u dane vikenda i praznika kada građani BiH iz Zapadne Evrope dolaze kući na vikend i za praznike, a nakon toga se krajem vikenda ili praznika vraćaju u mjesta privremenog boravka u Evropi?»

Sefer Halilović:

«Prvo pitanje upućeno je ministru civilnih poslova u Vijeću ministara BiH Sredoju Noviću.

Da li je do sada ovo ministarstvo finansiralo sve institucije kulture koje je osnovala država BiH? Prema nekim saznanjima, ovo ministarstvo je za ove institucije izdvojilo 2 miliona KM godišnje što je oko 50% stvarnih potreba. Da li se ostvaruje ikakva kontrola nad utroškom ovih sredstava, odnosno da li su upravni odbori i direktori validni i kad im ističe mandat? Ko ih je i kad imenovao i da li je to urađeno po zakonu? Koji je zakon o muzejskoj djelatnosti na snazi u BiH? Odnosno, ako se ne primjenjuje i ne poštuje nikakav zakon, da li Vijeće ministara BiH krši Aneks 2. Dejtonskog mirovnog sporazuma u kojem je reguliran kontinuitet pravnih propisa BiH? Suština cijele priče je u pitanju - pravi li resor ministarstva razliku između institucija kulture od značaja za BiH i institucija kulture koje je osnovala BiH i šta po ovom pitanju treba, misli i kani uraditi?»

«Drugo pitanje upućeno je Kolegiju Predstavničkog doma Parlamentarne skupštine BiH. Zašto se ne vrši televizijski prijenos sjednica Parlamentarne skupštine BiH, kada je u članu 153. stav 3. Poslovnika Predstavničkog doma Parlamentarne skupštine BiH navedeno da se za poslanička pitanja minimalno izdvaja sat vremena na svakoj redovnoj plenarnoj sjednici i osigurava direktan TV prijenos?»

Selim Bešliagić:

«Poslaničko pitanje je za predsjedavajućeg Vijeća ministara BiH, a jednostavno je, zahtijevam od predsjedavajućeg Vijeća ministara BiH da odgovori na pitanje: Zašto nije otvoren i zašto nije počeo raditi carinski terminal u Tuzli?»

Denis Bećirović:

«Ja imam dva poslanička pitanja:

Prvo: Zašto Ministarstvo odbrane BiH ne prihvata zahtjev Univerziteta u Tuzli za učešće u raspodjeli objekata koji su bili u nadležnosti Vojske Federacije BiH i to kasarne Husein kapetan Gradašćević u Tuzli, te strelišta Pašabunar za potrebe Univerziteta u Tuzli?

Drugo pitanje: Da li je tačno da su slični objekti ili jedan njihov dio, a koji su u nadležnosti vojske u Sarajevu, Banjoj Luci i u nekim drugim gradovima, već dodijeljeni univerzitetima u tim gradovima?»

Lazar Prodanović:

«Pitanje upućujem Ministarstvu sigurnosti BiH. Kakav je stav Ministarstva sigurnosti BiH povodom izjava nekih političara i članova ovog parlamenta da oduzimanje državljanstva BiH određenim licima ne mora značiti da ta lica moraju napustiti BiH? Da li je to poziv da ta lica bez državljanstva ostanu u BiH i kakve to posljedice može imati na sigurnost zemlje?»

Šemsudin Mehmedović:

«Ja sam na jednoj od prethodnih sjednica postavio pitanje ministru prometa i komunikacija BiH. S obzirom da do danas nisam dobio odgovor, danas postavljam novih šest pitanja. Nadam se da ću dobiti odgovor:

Prvo pitanje Ministarstvu prometa i komunikacija BiH: Kada će i na osnovu kojeg pravilnika biti usklađeni redovi vožnje međunarodnih autobuskih linija, s obzirom da to nije učinjeno od 1996. godine?

Drugo, na osnovu čega, na osnovu kojeg propisa su tzv. međurepubličke linije između RS-a i Srbije i Crne Gore proglašene međudržavnim?

Treće, na osnovu čega se vrši raspodjela CEMT dozvola? Po nekom ključu, 1/3 Republici Srpskoj, 2/3 Federaciji a od toga 60% Bošnjacima, odnosno bošnjačkim firmama i 40% hrvatskim. Gdje je takav princip propisan? Valjda se dozvole izdaju za voznu jedinicu.

Četvrto, zašto se sekretar Ministarstva, u svojim aktima, poziva na zakone susjednih država a ne na zakone BiH? Primjer akt broj: 03-29-5-855/07, od 20.3.2007. godine.

Peto, da li je usvojen, odnosno da li je ustrojen Registar međunarodnih linija?

I šesto, kada će ovo ministarstvo konačno svoje aktivnosti uskladiti sa zakonima ove države?»

U okviru poslaničkih pitanja, iznesena su dva prijedloga zaključka koja glase:

Milica Marković: «Obavezuje se Vijeće ministara BiH, odnosno resorna ministarstva i službe da u roku od 30 dana od dana dostavljanja pitanja dostave odgovor.»

Denis Bećirović: «Polazeći od toga da je Predstavnički dom Parlamentarne skupštine BiH najviši organ zakonodavne vlasti u BiH koji, između ostalog, ima nadležnost da bira i razrješava Vijeće ministara BiH, a uviđajući neodgovoran odnos ministara koji nakon sedam održanih sjednica Predstavničkog doma krše Poslovnik Predstavničkog doma, posebno članove 151. i 155., Predstavnički dom na svojoj 8. sjednici zaključuje da će od naredne sjednice pokrenuti pitanje smjene onih ministara koji krše odredbe Poslovnika Predstavničkog doma i na taj način degradiraju najviši organ zakonodavne vlasti.»

U vezi s prijedlogom Milice Marković, predsjedavajući Belkić podsjetio je da je Poslovnikom određen rok od 30 dana za dostavljanje odgovora na poslanička pitanja. Imajući ovo u vidu, Milica Marković odustala je od prijedloga.

Drago Kalabić rekao je da se isti razlog može primijeniti i na prijedlog Bećirovića, jer je Poslovnikom regulirano i pitanje smjene Vijeća ministara BiH.

Predsjedavajući Belkić konstatirao je da je Milica Marković povukla svoj prijedlog, a da je dužan na glasanje dati prijedlog Denisa Bećirovića pošto je ostao pri prijedlogu. Uslijedilo je glasanje.

„Za” je galasalo 19 (Federacija BiH 15, RS četiri), „protiv” pet, „suzdržala” su se četiri poslanika.

Kako prijedlog zaključka nije dobio entitetsku većinu, odmah je provedeno usaglašavanje u Kolegiju.

Nije bilo saglasnosti.

U drugom krugu glasanja „protiv” prijedloga zaključka iz Republike Srpske glasalo je šest, iz Federacije BiH dva poslanika.

Predsjedavajući Belkić konstatirao je da je usvojen zaključak koji je predložio Denis Bećirović.

Ad - 3. Zahtjev poslanika Jerka Ivankovića Lijanovića za razmatranje Prijedloga zakona o izmjeni Zakona o porezu na dodatu vrijednost po hitnom postupku, u skladu s članom 127. Poslovnika Doma

Poslije kraćih uvodnih napomena koje je povodom ove tačke iznio predsjedavajući Belkić, predlagatelj Zakona Jerko Ivanković Lijanović predložio je da se Prijedlog zakona, umjesto po hitnom, razmatra po skraćenom postupku, u skladu s članom 126. Poslovnika.

Predsjedavajući je ovaj prijedlog dao na glasanje.

„Za” je glasalo 15, „protiv” 16, „suzdržala” su se tri poslanika.

Predsjedavajući je konstatirao da nije usvojen prijedlog za skraćenu proceduru, pa će se Prijedlog zakona iz ove tačke razmatrati u redovnoj proceduri.

Ad – 4. Prijedlog zakona o dopunama Izbornog zakona BiH (drugo čitanje)

Predsjedavajući Belkić je u uvodnim napomenama podsjetio da u plenarnoj fazi nema amandmana na Prijedlog zakona.

U raspravi su učestvovali: Momčilo Novaković, Šefik Džaferović i Drago Kalabić.

Zatim je predsjedavajući proveo glasanje o Prijedlogu zakona u drugom čitanju.

„Za” je glasalo 19 (Federacija BiH 19 – iz RS-a nije bilo glasova „za”), „protiv” je glasalo 15, „suzdržala” su se dva poslanika.

Zbog nedostatka entitetske većine, provedno je usaglašavanje u Kolegiju i nije bilo saglasnosti.

U drugom krugu glasanja „protiv” Prijedloga zakona iz RS-a je glasalo 11, iz Federacije BiH četiri poslanika.

Predsjedavajući je konstatirao da nije usvojen Prijedlog zakona o dopunama Izbornog zakona BiH.

Ad – 5. Prijedlog zakona o izmjeni Zakona o konkurenciji BiH (drugo čitanje)

- predlagatelj: poslanik Milorad Živković

U uvodnim napomenama predsjedavajući je podsjetio na Izvještaj nadležne komisije, u kojem je navedeno da nije bilo amandmana i da je Komisija jednoglasno prihvatila Prijedlog zakona.

O Prijedlogu zakona vođena je duža rasprava u kojoj su učestvovali: Azra Hadžiahmetović, Snježana Rajilić, Bakir Izetbegović, Selim Bešlić, Šefik Džaferović, Momčilo Novaković, Slavko Jovičić, Branko Dokić, Milorad Živković i Jozo Križanović.

Poslije rasprave, predsjedavajući je Prijedlog zakona dao na glasanje.

Sa 24 glasa „za” (Federacija BiH 13, RS 11), devet „protiv” i dva „suzdržana”, usvojen je Zakon o izmjeni Zakona o konkurenciji BiH.

Ad – 6. Prijedlog okvirnog zakona o predškolskom odgoju i obrazovanju u Bosni i Hercegovini (prvo čitanje)

Predsjedavajući Belkić podsjetio je da se Prijedlog ovog zakona razmatra po starom poslovniku, kao i da je nadležna komisija usvojila jedan amandman koji je postao sastavnim dijelom zakona.

O Prijedlogu zakona diskutirao je Denis Bećirović. Zatim je Dom, sa 30 glasova “za” (Federacija BiH 22, RS osam), dva “protiv” i dva “suzdržana”, usvojio Prijedlog zakona u prvom čitanju.

Predsjedavajući je predložio da se Prijedlog zakona razmatra i u drugom čitanju.

O ovom prijedlogu diskutirali su: Drago Kalabić, Selim Bešliagić i Milorad Živković.

“Za” prijedlog da se pređe u drugo čitanje glasalo je 20 poslanika iz Federacije BiH, iz RS-a nije bilo glasova “za”.

Predsjedavajući je konstatirao da prijedlog za drugo čitanje nije usvojen i da će biti uvršten u dnevni red naredne sjednice Doma.

Ad – 7. Godišnji izvještaj Centralne banke BiH za 2006. godinu

O Godišnjem izvještaju Centralne banke BiH diskutirali su: Bakir Izetbegović i Vinko Zorić, kao i guverner Centralne banke BiH Kemal Kozarić, koji je odgovorio na pitanja postavljena u raspravi.

Poslije rasprave, Dom je, sa 32 glasa “za” i dva “suzdržana”, usvojio Godišnji izvještaj Centralne banke za 2006. godinu.

Ad – 8. Finansijski izvještaj Centralne banke BiH za 2006. godinu

Nije bilo rasprave o Finansijskom izvještaju. Usvojen je sa 33 glasa “za” i jednim “suzdržanim”.

Ad – 9. Izvještaj o radu Centralne izborne komisije BiH za 2006. godinu

U uvodnim napomenama predsjedavajući Belkić podsjetio je na Mišljenje Ustavnopravne komisije, kao nadležne, o razmatranju Izvještaja, te naveo zaključak koji Komisija predlaže Domu na usvajanje.

U ime Centralne izborne komisije BiH govorio je Stjepan Mikić, predsjednik CIK-a.

U raspravi su učestvovali: Šefik Džaferović, Martin Raguž, Momčilo Novaković, Rifat Dolić, Šemsudin Mehmedović, Drago Kalabić, Sadik Bahtić, a nakon rasprave ponovo je govorio predsjednik CIK-a Stjepan Mikić.

Poslije rasprave, predsjedavajući je na glasanje dao Izvještaj Centralne izborne komisije BiH, sa Mišljenjem Ustavnopravne komisije o ovom izvještaju, u kojem su sadržane preporuke i sljedeći

ZAKLJUČAK

1. Potrebno je formirati interresornu radnu grupu sa zadatkom da pripremi tekst prijedloga izmjena i dopuna zakona u čijem su provođenju uočeni problemi, i to: Izbornog zakona BiH, Zakona o sukobu interesa u institucijama vlasti BiH i Zakona o finansiranju političkih stranaka.

2. Inerresornu radnu grupu činit će: tri poslanika iz Predstavničkog doma, tri poslanika iz Doma naroda Parlamentarne skupštine BiH, tri člana iz Vijeća ministara BiH i tri člana Centralne izborne komisije BiH.

Izvještaj CIK-a, sa Mišljenjem Komisije i ovim zaključkom, usvojen je jednoglasno (34 glasa).

Ad –10. Izvještaj o radu Pravobranilaštva BiH za 2006. godinu

U uvodnim napomenama predsjedavajući Belkić podsjetio je na Mišljenje Ustavnopravne komisije, koja je, pored ostalog, konstatirala da se nepopunjenost pozicija u Pravobranilaštvu BiH može negativno odraziti na kvantitet, kvalitet i efikasnost u radu Pravobranilaštva BiH, te da je neophodno što prije izvršiti odgovarajuće popune.

U raspravi su učestvovali: Bajazit Jašarević i Martin Raguž, a u ime Pravobranilaštva BiH govorila je Dragica Miletić, pravobranilac BiH.

Poslije rasprave, predsjedavajući Belkić dao je na glasanje Izvještaj o radu Pravobranilaštva BiH, s Mišljenjem Ustavnopravne komisije u kojem je sadržan sljedeći

Z A K L J U Č A K

Predstavnički dom zahtijeva od Vijeća ministara BiH da pristupi rješavanju pitanja imovine Bosne i Hercegovine hitnim donošenjem zakona u toj oblasti.

Sa 30 glasova "za" i jednim "suzdržanim", usvojen je Izvještaj o radu Pravobranilaštva BiH za 2006. godinu, s Mišljenjem Ustavnopravne komisije i ovim zaključkom.

Ad – 11. Izvještaj komisije Kolegija o nastojanju za postizanje sporazuma o prijedlogu zaključka poslanika Sadika Ahmetovića, predloženog na 7. sjednici Doma

Predsjedavajući je podsjetio na Izvještaj komisije Kolegija o usaglašavanju, napomenuvši da nije postignuta saglasnost. Zatim je proveo drugi krug glasanja o prijedlogu zaključka.

"Za" prijedlog zaključka u drugom krugu glasanja glasalo je 15, "protiv" 11 – iz Republike Srpske, "suzdržala" su se četiri poslanika.

Predsjedavajući je konstatirao da zaključak nije usvojen.

Ad – 12. Razmatranje inicijative za pokretanje javne kampanje protiv iskorištavanja radnika na crno i utvrđivanje liste poslodavaca koji zapošljavaju radnike na crno (predlagač: poslanik Denis Bećirović)

Denis Bećirović, kao predlagač ove tačke, podnio je obrazloženje prijedloga zaključka, koji glasi:

"Zadužuje se Vijeće ministara BiH da, u saradnji s entitetskim vladama, pokrene javnu kampanju protiv iskorištavanja radnika na crno, te da u roku od šest mjeseci sačine crnu listu poslodavaca koji zapošljavaju radnike na crno ili posluju na druge nedozvoljene načine, odnosno ne izmiruju obaveze prema radnicima."

U raspravi su učestvovali: Sadik Bahtić, Selim Bešlić, Denis Bećirović, Jerko Ivanković Lijanović, Milorad Živković, Momčilo Novaković, Mirko Okolić, Jozo Križanović, Vinko Zorić i Slavko Jovičić.

Poslije rasprave, predsjedavajući je proveo glasanje.

"Za" prijedlog zaključka glasalo je 14 poslanika – svi iz Federacije BiH, "protiv" tri, "suzdržalo" se 12. Zbog nedostatka entitetske većine, odmah je izvršeno usaglašavanje u Kolegiju, ali nije bilo saglasnosti.

U drugom krugu glasanja iz Republike Srpske "protiv" je glasalo 11 poslanika, što je više od 2/3 iz entiteta.

Predsjedavajući je konstatirao da predloženi zaključak nije usvojen.

Ad – 13. Imenovanje tri člana iz Predstavničkog doma u Komisiju za izbor teksta himne Bosne i Hercegovine

Predsjedavajući je iznio prijedlog Proširenog kolegija da se u ovu komisiju iz Predstavničkog doma predlože: Adem Huskić, Vinko Zorić i Slavko Jovičić.

Kratko su diskutirali Momčilo Novaković i Denis Bećirović.

Sa 28 glasova "za", tri "protiv" i dva "suzdržana", usvojen je ovaj prijedlog Kolegija.

Ad – 14. Imenovanje članova u komisije i delegacije Parlamentarne skupštine BiH

U okviru ove tačke, na prijedlog klubova poslanika, u komisije i delegacije izabrani su poslanici kako slijedi:

- a) Adem Huskić je, umjesto Vahida Heće, izabran za člana:
 - Ustavnopravne komisije
 - Komisije za finansije i budžet Predstavničkog doma
 - Zajedničke komisije za odbranu i sigurnost
 - Delegacije Parlamentarne skupštine BiH u Interparlamentarnoj uniji.
- b) Salko Sokolović je, umjesto Edina Mušića, izabran za člana:
 - Komisije za vanjsku trgovinu i carine
 - Komisije za finansije i budžet
- c) Velimir Jukić izabran je, umjesto Slavka Matića, za člana Ustavnopravne komisije i
- d) Slavko Matić izabran je, umjesto Velimira Jukića, za člana Komisije za saobraćaj i komunikacije
- e) Vinko Zorić imenovan je za člana Delegacije Parlamentarne skupštine u IPU.

Ad – 15. Davanje saglasnosti za ratifikaciju:

- a) Sporazuma između Vijeća ministara BiH i Vlade Kraljevine Danske o prihvatu lica čiji je boravak protuzakonit,
- b) Sporazuma između Bosne i Hercegovine i Republike Hrvatske o izmjeni Sporazuma između Vlade Bosne i Hercegovine, Vlade Federacije BiH i Vlade Republike Hrvatske o međusobnom izvršavanju sudskih odluka i krivičnim stvarima,
- c) Sporazuma između Vijeća ministara BiH i Vlade Republike Mađarske o saradnji u oblasti obrazovanja, nauke i kulture,
- d) Sporazuma o privrednoj saradnji između Vijeća ministara BiH i Vlade Republike Mađarske,
- e) Strateškog sporazuma o saradnji između Vijeća ministara BiH i Ureda Evropske policije (EUROPOL),
- f) Ugovora o finansiranju između Bosne i Hercegovine i Evropske investicione banke – Projekat obnove električne energije II ,
- g) Privremenog ugovora o slobodnoj trgovini između Vijeća ministara BiH i Misije privremene uprave Ujedinjenih naroda na Kosovu,
- h) Sporazuma između Vijeća ministara BiH i Vlade Republike Francuske o readmisiji lica s nezakonitim statusom i Protokola o primjeni Sporazuma,
- i) Sporazuma između vijeća ministara BiH i Vlade Arapske Republike Egipat o saradnji u oblasti suzbijanja kriminala.

U uvodnim napomenama predsjedavajući Belkić rekao je da je nadležna Komisija za vanjske poslove razmatrala akte iz ove tačke i predložila Domu davanje saglasnosti za njihovu ratifikaciju. Predložio je da se raspravlja i glasa u paketu.

Momčilo Novaković prigovorio je na Privremeni ugovor o slobodnoj trgovini između Vijeća ministara BiH i Misije privremene uprave Ujedinjenih naroda na Kosovu, rekavši, pored ostalog, da je neprihvatljiv za Klub SDS-a jer se na ovaj način Kosovo tretira kao država.

U raspravi je učestvovao i Drago Kalabić, koji je predložio da se izjašnjavanje o ovom ugovoru odgodi, a da se o ostalim aktima iz ove tačke glasa u paketu.

Prijedlog Kalabića usvojen je sa 24 glasa "za" i jednim "protiv".

Sa 33 glasa "za" i jednim "suzdržanim", Dom je dao saglasnost za ratifikaciju sporazuma iz ove tačke pod: a), b), c), d), e), f), h) i i).

Kako je odlučeno, odgođeno je izjašnjavanje o podtački g) Privremenom ugovoru o slobodnoj trgovini između Vijeća ministara BiH i Misije privremene uprave Ujedinjenih naroda na Kosovu.

Ovim je, u 14,20 sati, završena 7. sjednica Predstavničkog doma.

Sastavni dio Zapisnika je transkript 8. sjednice.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
Beriz Belkić